



KOSOVO SPECIALIST CHAMBERS  
DHOMAT E SPECIALIZUARA TË KOSOVES  
SPECIJALIZOVANA VEĆA KOSOVA

**Numri:** KSC-BC-2020-06

**Vendosi:** Gjykatësi i procedurës paraprake  
Gjykatës Nikola Giju

**Administratore:** Dr. Fidelma Donlon

**Data:** 26 tetor 2020

**Gjuha:** Anglishte

**Klasifikimi:** Publik

---

**Version i redaktuar publik i**

**Versionit të korrigjuar të vendimit për autorizimin e kontrollimit dhe  
sequestrimit**

---

**Prokurorit të Specializuar**

Xhek Smith

**GJYKATËSI I PROCEDURËS PARAPRAKE**,<sup>1</sup> në përputhje me nenet 39(3), 53, 54, dhe 55 të Ligjit nr. 05/L-053 për Dhomat e Specializuara dhe Zyrën e Prokurorit të Specializuar (“Ligji”) dhe rregullat 31, 32, 33, 37, 39, 62, dhe 208(1) të Rregullores së Procedurës dhe të Provave para Dhomave të Specializuara të Kosovës (“Rregullorja”), lëshon vendimin e mëposhtëm.

## I. HISTORIKU PROCEDURAL

1. Më 24 prill 2020, Zyra e Prokurorit të Specializuar (“ZPS”) parashtrioi për konfirmim një aktakuzë rreptësisht konfidenciale dhe *ex parte*, së bashku me materialin provues në mbështetje të pretendimeve faktike dhe një përmbledhje të detajuar ku tregohet lidhja e çdo prove me secilën akuzë.<sup>2</sup>
2. Më 28 maj 2020, ZPS-ja kërkoi ndër të tjera që gjykatësi i procedurës paraprake të autorizojë kontrollim dhe sekuestrim në lidhje me vetë Jakup Krasniqin (“z. Krasniqi”), vendin e arrestimit të tij, si dhe shtëpitë e banimit, zyrat dhe automjetet e z. Krasniqi.<sup>3</sup>
3. Më 2 korrik 2020, gjykatësi i procedurës paraprake urdhëroi ZPS-në që deri më 24 korrik 2020 të dorëzonte për protokollim një aktakuzë të rishikuar.<sup>4</sup>
4. Më 24 korrik 2020, ZPS-j parashtrioi aktakuzën e rishikuar për konfirmim (“Aktakuza e Rishikuar”).<sup>5</sup>

---

<sup>1</sup> KSC-BC-2020-06, F00001, Kryetarja, *Vendim për caktimin e gjykatësit të procedurës paraprake*, 23 prill 2020, publik.

<sup>2</sup> KSC-BC-2020-06, F00002, Prokurori i Specializuar, *Parashtrim i Aktakuzës për konfirmim*, 24 prill 2020, rreptësisht konfidencial dhe *ex parte*, me shtojcat 1-3, rreptësisht konfidenciale dhe *ex parte*.

<sup>3</sup> KSC-BC-2020-06, F00005, Prokurori i Specializuar, *Kërkesë për lëshimin e fletarrestimeve dhe urdhrave në lidhje me to*, 28 maj 2020 (“Kërkesa”), rreptësisht konfidenciale dhe *ex parte*, me shtojcat 1-3 rreptësisht konfidenciale dhe *ex parte*.

<sup>4</sup> KSC-BC-2020-06, F00010, Gjykatësi i procedurës paraprake, *Urdhër Prokurorit të Specializuar në bazë të rregullës 86(4) të Rregullores*, 2 korrik 2020, rreptësisht konfidencial dhe *ex parte*.

<sup>5</sup> KSC-BC-2020-06, F00011, Prokurori i Specializuar, *Parashtrim i Aktakuzës së Rishikuar për konfirmim*, 24 korrik 2020, rreptësisht konfidencial dhe *ex parte*, me shtojcën 1 rreptësisht konfidenciale dhe *ex parte*.

5. Më 11 shtator 2020, gjykatësi i procedurës paraprake urdhëroi ZPS-në që deri më 30 shtator 2020 të dorëzonte, ndër të tjera, informacion në lidhje me adresën aktuale apo të fundit të ditur të z. Krasniqi ("Urdhri i 11 shtatorit 2020").<sup>6</sup>
6. Më 30 shtator 2020, ZPS-ja dorëzoi informacionin e kërkuar.<sup>7</sup>
7. Më 19 tetor 2020, gjykatësi i procedurës paraprake lëshoi një urdhër në të cilin caktohej data e synuar për nxjerrjen e vendimit mbi Aktakuzën e Rishikuar.<sup>8</sup>
8. Më 21 tetor 2020, ZPS-ja dorëzoi informacion plotësues në bazë të Urdhrit të 11 shtatorit 2020.<sup>9</sup>
9. Më 26 tetor 2020, gjykatësi i procedurës paraprake nxori vendimin për konfirmimin e Aktakuzës së Rishikuar ("Vendimi i Konfirmimit")<sup>10</sup> dhe lëshoi fletarrestim për z. Krasniqi.<sup>11</sup>

## II. PARASHTRIMET

10. Krahas lëshimit të fletarrestimit për z. Krasniqi dhe urdhrit për transferimin e tij, ZPS-ja kërkon ndër të tjera që gjykatësi i procedurës paraprake të autorizojë kërkesën e saj për kontrollim dhe sekuestrim.<sup>12</sup> ZPS-ja kërkon që gjykatësi i procedurës paraprake të autorizojë ZPS-në dhe/ose autoritetet zbatuese të fletarrestimit, që në bashkëpunim me ZPS-në: (a) të kontrollojnë z. Krasniqi, vendin e arrestimit të tij, si

---

<sup>6</sup> KSC-BC-2020-06, F00015, Gjykatësi i procedurës paraprake, *Urdhër Prokurorit të Specializuar për parashtrime plotësuese*, 11 shtator 2020, rreptësisht konfidencial dhe *ex parte*.

<sup>7</sup> KSC-BC-2020-06, F00019, Prokurori i Specializuar, *Parashtrime plotësuese në bazë të urdhrit KSC-BC-2020-06/F00015*, 30 shtator 2020, rreptësisht konfidenciale dhe *ex parte*, me shtojcën 1 rreptësisht konfidenciale dhe *ex parte*.

<sup>8</sup> KSC-BC-2020-06, F00023, Gjykatësi i procedurës paraprake, *Urdhër për caktimin e datës së synuar për një vendim sipas nenit 39(2)*, 19 tetor 2020, rreptësisht konfidencial dhe *ex parte*.

<sup>9</sup> KSC-BC-2020-06, F00025, Prokurori i Specializuar, *Parashtrim plotësues i dytë i Prokurorisë lidhur me KSC-BC-2020-06/F00019*, 21 tetor 2020, rreptësisht konfidencial dhe *ex parte*.

<sup>10</sup> KSC-BC-2020-06, F00026, Gjykatësi i procedurës paraprake, *Vendim për konfirmimin e Aktakuzës kundër Hashim Thaçit, Kadri Veselit, Rexhep Selimit dhe Jakup Krasniqit*, 26 tetor 2020, rreptësisht konfidencial dhe *ex parte*.

<sup>11</sup> KSC-BC-2020-06, F00027/A07, Gjykatësi i procedurës paraprake, *Fletarrestim për Jakup Krasniqin*, 26 tetor 2020, rreptësisht konfidencial dhe *ex parte*.

<sup>12</sup> Kërkesa, para. 2, 42, 60(b).

dhe shtëpitë e banimit, zyrat dhe automjetet e z. Krasniqi; dhe (b) të sekuestrojnë prova që besohet se janë përdorur në, janë në lidhje me, ose mund të jenë të rëndësishme për krimet e paraqitura në aktakuzë, përpjekjet kohëve të fundit për ndërhyrje në administrimin e drejtësisë, dhe [REDAKTUAR] (“kontrollimi dhe sekuestrimi i kërkuar”).<sup>13</sup> Në veçanti, ZPS-ja kërkon, ndër të tjera, prova që lidhen me veprimtarinë e z. Krasniqi midis viteve 1998 dhe 1999, marrëdhëniet ose ndërveprimet e tij me Ushtrinë Çlirimtare të Kosovës (“UÇK”) dhe/ose qeverinë e përkohshme të Kosovës (“QPK”) ose me anëtarë të tyre, apo me viktimë, dëshmitarë ose bashkëkryes të pretenduar.<sup>14</sup> ZPS-ja vë në dukje se ndër sendet që do të sekuestrohen mund të përfshihen: shënime nga kontakte apo mbledhje, të dhëna financiare ose pronësore, ditarë, regjistra, vendime, fotografi, videoincizime dhe audioincizime, urdhra, udhëzime, direktiva, raporte, politika, protokolle ose rregullore, si dhe kompjuterë, telefona dhe pajisje të tjera që logjikisht mund të pritet se përmbajnë prova relevante.<sup>15</sup>

11. ZPS-ja parashtron se ekziston dyshim i bazuar se z. Krasniqi ka kryer vepra penale brenda juridiksionit të Dhomave të Specializuara, si dhe dyshim i bazuar se ai mund të ketë me vete, apo në shtëpitë e banimit, zyrat ose automjetet e tij, prova të domosdoshme për hetimin.<sup>16</sup>

12. ZPS-ja parashtron gjithashtu se, duke mbajtur parasysh rrezikun e ndërhyrjes dhe pengimit,<sup>17</sup> çfarëdo provash që posedon z. Krasniqi nuk mund të sigurohen në mënyrë tjetër dhe kontrollimi e sekuestrimi i kërkuar janë e vetmja masë për sigurimin e tyre për nevojat e hetimit.<sup>18</sup>

---

<sup>13</sup> Kërkesa, para. 42.

<sup>14</sup> Kërkesa, para. 42(b).

<sup>15</sup> Kërkesa, para. 42(b).

<sup>16</sup> Kërkesa, para. 43.

<sup>17</sup> Kërkesa, para. 34-38, 43.

<sup>18</sup> Kërkesa, para. 43.

13. ZPS-ja parashtron se cenimi që do t'u shkaktohej të drejtave të z. Krasniqi për pronë dhe privatësi është proporcional me qëllimin legjitim të hetimit dhe nuk eliminon thelbin e atyre të drejtave.<sup>19</sup>

14. Së fundi, ZPS-ja kërkon autorizimin për mbajtjen në ruajtje të çfarëdo prove të sekuestruar për aq kohë sa është e nevojshme për vlerësimin e provave, dhe në qoftë se provat gjykohen relevante, afati i autorizimi të zgjatet për aq kohë sa është e nevojshme për hetimet dhe procedurat gjyqësore.<sup>20</sup>

### III. DISPOZITAT LIGJORE PËRKATËSE

15. Në përputhje me nenin 35(2)(b) të Ligjit, Prokurori i Specializuar mund të mbledhë dhe shqyrtojë informacion dhe prova.

16. Sipas rregullave 31 dhe 37 të Rregullores, kontrollimi i një personi, i pronës së tij ose i vendndodhjeve apo objekteve të tjera, si dhe sekuestrimi i çfarëdo prove të gjetur gjatë kontrollimit, mund të autorizohet në qoftë se:

- (a) ka pritshmëri të arsyeshme për privatësinë në lidhje me vendndodhjet që do të kontrollohen dhe sendet që do të sekuestrohen;<sup>21</sup>
- (b) lidhur me kontrollimin e vendndodhjeve dhe objekteve, ekziston dyshim i bazuar se (i) personi ka kryer, është duke kryer, ose është në prag të kryerjes së një vepre penale brenda juridiksionit të Dhomave të Specializuara, dhe (ii) kontrollimi do të rezultojë, ndër të tjera, në zbulimin dhe sekuestrimin e provave të domosdoshme për hetimin.<sup>22</sup> Lidhur me

---

<sup>19</sup> Kërkesa, para. 44.

<sup>20</sup> Kërkesa, para. 45.

<sup>21</sup> Rregulla 37(2) e Rregullores. *Shih gjithashtu*, KSC-CC-PR-2017-03, F00006, Dhoma e Gjykatës Kushtetuese, *Aktvendim mbi Referimin e Rregullave të Rishikuara të Rregullores së Procedurës dhe të Provave miratuar nga Plenarja më 29 maj 2017, Dhomës së Specializuar të Gjykatës Kushtetuese sipas nenit 19(5) të Ligjit nr. 05/L-053 për Dhomat e Specializuara dhe Zyrën e Prokurorit të Specializuar ("Aktvendimi i Dhomës së Gjykatës Kushtetuese të Dhomave të Specializuara të Kosovës i datës 28 qershor 2017")*, 28 qershor 2017, para. 69.

<sup>22</sup> Rregulla 37(2)(a) e Rregullores.

kontrollimin e personit, ekziston dyshim i bazuar se kontrollimi do të rezultojë në zbulimin e provave të një vepre penale brenda juridiksionit të Dhomave të Specializuara dhe sekuestrimin e tyre;<sup>23</sup>

(c) kontrollimi është i domosdoshëm për hetimin;<sup>24</sup>

(d) masa hetimore është e pashmangshme, d.m.th. në rrethanat konkrete provat nuk mund të sigurohen në mënyrë tjetër dhe kontrollimi dhe sekuestrimi i kërkuar duket se janë e vetmja masë e efektshme për nevojat e hetimit;<sup>25</sup> dhe

(e) cenimi i shkaktuar mbi të drejtën e personit për integritet personal, privatësi apo pronë, është proporcional me qëllimin legjitim të hetimit dhe nuk eliminon thelbin e të drejtës së garantuar.<sup>26</sup>

17. Sipas rregullës 37(4) të Rregullores, çdo vendim për autorizimin e kontrollimit dhe sekuestrimit përmban: (a) orarin, kohëzgjatjen dhe shkallën e kontrollimit dhe sekuestrimit, duke përfshirë të dhëna për personin ose pronën, vendndodhjen, mjediset ose objektin në lidhje me të cilat autorizohet masa dhe (b) procedurën e raportimit në lidhje me zbatimin e masës së autorizuar dhe materialin e sekuestruar, në përputhje me rregullën 31(2) të Rregullores.

18. Bazuar në rregullën 39(1) dhe (2) të Rregullores, kontrollimi dhe sekuestrimi duhet të kryhen në prani të personit përkatës, përveçse kur ky person nuk mund të gjendet ose refuzon të jetë i pranishëm gjatë kryerjes së kontrollimit, dhe kur çdo vonesë në kryerjen e kontrollimit dhe sekuestrimit do të rrezikonte hetimin apo sigurinë ose pronën e një dëshmitari, viktime apo personi tjetër të rrezikuar. Prokurori i Specializuar gjithashtu duhet: (a) t'i japë personit përkatës vendimin që autorizon kryerjen e kontrollimit dhe sekuestrimit; (b) ta informojë personin në fjalë për të

---

<sup>23</sup> Rregulla 37(3) e Rregullores.

<sup>24</sup> Rregulla 31(1)(b) e Rregullores.

<sup>25</sup> Rregulla 37(1) e Rregullores. *Shih gjithashtu* Aktvendimi i Dhomës së Gjykatës Kushtetuese të Dhomave të Specializuara të Kosovës i datës 28 qershor 2017, para. 62-67.

<sup>26</sup> Rregulla 31(1)(c) e Rregullores.

drejtat e tij; (c) të sigurojë praninë e mbrojtësit të personit, përveçse kur personi heq dorë nga ushtrimi i kësaj të drejte, apo nuk është e arsyeshme të pritët për praninë e mbrojtësit; dhe (d) të sigurojë praninë e një vëzhguesi të pavarur gjatë kryerjes së kontrollimit dhe sekuestrimit.

19. Bazuar në rregullën 32(1) të Rregullores, çdo material i sekuestruar mbahet, ruhet dhe mbrohet në mënyrën e duhur. Paneli që autorizon sekuestrimin saktëson: (a) procedurën dhe masat paraprake për ruajtjen, mbrojtjen dhe transferimin e materialit të sekuestruar; (b) kohëzgjatjen e mbajtjes së materialit të sekuestruar; dhe (c) udhëzimet dhe afatet për kthimin ose asgjësimin e materialit të sekuestruar.

20. Sipas rregullës 62 të Rregullores, gjatë ushtrimin të detyrave të veta, Prokurori i Specializuar, ndër të tjera, merr masat për mbrojtjen dhe respektimin e duhur të viktimave dhe dëshmitarëve, si dhe të të drejtave themelore të të akuzuarve.

21. Neni 35(3) i Ligjit përcakton se policia në kuadër të ZPS-së ka autoritetin dhe përgjegjësinë për të ushtruar kompetencat që ka Policia e Kosovës në bazë të legjislacionit të Kosovës. Në përputhje me nenin 53(1) të Ligjit, të gjitha subjektet dhe personat në Kosovë përmbushin pa vonesë të papërligjur çdo kërkesë për ndihmë, urdhër apo vendim të Dhomave të Specializuara. Bazuar në rregullën 202(2) të Rregullores, gjykatësi i procedurës paraprake mund të urdhërojë çfarëdo kushtesh që i gjykon të nevojshme, përfshirë në lidhje me konfidencialitetin dhe masat mbrojtëse. Këta urdhra përmbushen pa vonesë të papërligjur, në pajtim me nenin 53(1) të Ligjit dhe rregullën 202(3) të Rregullores.

22. Në përputhje me nenin 55 të Ligjit dhe rregullën 208(1) të Rregullores, gjykatësi i procedurës paraprake mund të kërkojë bashkëpunimin dhe ndihmën e një shteti të tretë nëse është e nevojshme për hetimin dhe ndjekjen penale të personave të akuzuar për kryerjen e veprave penale brenda juridiksionit të Dhomave të Specializuara.

#### IV. DISKUTIM

##### A. KRITERET E KONTROLLIMIT DHE SEKUESTRIMIT

23. Kontrollimi dhe sekuestrimi i kërkuar përfshijnë kontrollimin e z. Krasniqi, të vendit të arrestimit, shtëpive të banimit, zyrave dhe automjeteve të tij. Gjykatësi i procedurës paraprake gjykon se shtëpia e banimit, prona, përfshirë automjetet, dhe zyrat e një personi, bartin në vetvete pritshmëri të arsyeshme për privatësi. Po kështu edhe vendi i arrestimit, megjithëse nuk është i ditur në këtë moment, mund të bartë në vetvete pritshmëri të arsyeshme për privatësi.<sup>27</sup> Për këto arsye janë të zbatueshme garancitë mbrojtëse të parapara në Ligj dhe Rregullore.

24. Në kontekstin e kontrollimit të shtëpisë/shtëpive të banimit, zyrës/zyrave, automjetit/automjeteve, dhe/ose vendit të arrestimit të z. Krasniqi dhe sekuestrimit përkatës të sendeve, gjykatësi i procedurës paraprake rikujton konstatimet e tij në Vendimin e Konfirmimit se ekziston dyshim i bazuar mirë se z. Krasniqi ka kryer krime brenda juridiksionit të Dhomave të Specializuara.<sup>28</sup> Gjykatësi i procedurës paraprake konstaton gjithashtu se, duke mbajtur parasysh sa më lart, ekziston dyshim i bazuar se kontrollimi dhe sekuestrimi i kërkuar në lidhje me vendndodhjet dhe sendet e lartpërmendura mund të rezultojë në prova ose informacion të domosdoshëm për hetimin prej ZPS-së të krimeve të paraqitura në aktakuzë, përfshirë për respektimin e të drejtave të viktimave. Gjykatësi i procedurës paraprake konstaton gjithashtu se ekziston dyshim i bazuar se prova dhe informacion i tillë mund të gjenden në shtëpinë/shtëpitë e banimit, zyrën/zyrat, automjetin/automjetet, dhe/ose vendin e arrestimit të z. Krasniqi. Në lidhje me kontrollimin e z. Krasniqi, duke marrë parasysh pretendimet se ai ka kryer krime brenda juridiksionit të Dhomave të Specializuara, gjykatësi i procedurës paraprake konstaton ekzistencën e dyshimit të

---

<sup>27</sup> *Shih* Aktvendimi i Dhomës së Gjykatës Kushtetuese të Dhomave të Specializuara të Kosovës i datës 28 qershor 2017, para. 69.

<sup>28</sup> Vendimi i Konfirmimit, para. 474, 478, 482, 512.



bazuar se kontrollimi i tij mund të rezultojë në gjetjen dhe sekuestrimin e provave në lidhje me ato krime.

25. Në bazë të parashtrimeve të Prokurorit të Specializuar dhe materialit të paraqitur në mbështetje të tyre, gjykatësi i procedurës paraprake vlerëson se nuk ekziston dyshim i bazuar se z. Krasniqi ka bërë përpjekje për ndërhyrje në administrimin e drejtësisë dhe/ose është përfshirë në veprime të tjera që mund të përbëjnë vepër penale në bazë të nenit 15(2) të Ligjit.

26. Për arsyet e lartpërmendura, gjykatësi i procedurës paraprake konstaton se kontrollimi dhe sekuestrimi që do të kryejë ZPS-ja në lidhje me z. Krasniqi, shtëpinë/shtëpitë e banimit, zyrën/zyrat, automjetin/automjetet dhe/ose vendin e arrestimit të tij, duhet të kufizohen vetëm në ato prova ose informacione që besohet se janë përdorur në, janë në lidhje me, ose janë të rëndësishme për hetimin apo për çfarëdo faze të procedurave në të ardhmen në lidhje me akuzat e konfirmuara, përfshirë edhe respektimin e të drejtave të viktimave, sikurse specifikohet më poshtë (“kontrollimi dhe sekuestrimi i kërkuar”).

27. Për më tepër, duke marrë parasysh se në shtëpinë/shtëpitë e banimit, zyrën/zyrat, automjetin/automjetet, dhe/ose vendin e arrestimit të z. Krasniqi mund të gjendet informacion i rëndësishëm në lidhje me akuzat e konfirmuara, përfshirë informacion në lidhje me respektimin e të drejtave të viktimave, gjykatësi i procedurës paraprake konstaton se kontrollimi dhe sekuestrimi i kërkuar janë të domosdoshëm për hetimin e ZPS-së. Po kështu, kontrollimi i z. Krasniqi është i domosdoshëm për arsye se gjatë arrestimit apo kontrollimit të mjediseve të tij, ai mund të orvatet të fshehë në trup prova të tilla. Për arsyet e lartpërmendura, gjykatësi i procedurës paraprake konstaton se kontrollimi dhe sekuestrimi i autorizuar janë të domosdoshëm për hetimin prej ZPS-së të akuzave të konfirmuara dhe për çfarëdo procedurash në të ardhmen.

28. Në lidhje me kriterin e pashmangshmërisë, gjykatësi i procedurës paraprake thekson se z. Krasniqi në mënyrë të përsëritur ka sulmuar publikisht ligjshmërinë dhe

mandatin e Dhomave të Specializuara.<sup>29</sup> Deklarata të tilla janë shprehje e gatishmërisë së tij për pengimin e procedurave dhe rrezikut shoqëruar të ndërhyrjes në prova. Rrjedhimisht, gjykatësi i procedurës paraprake konstaton se çfarëdo provash ose informacioni që mund të ketë z. Krasniqi nuk mund të sigurohen në mënyrë tjetër dhe kontrollimi dhe sekuestrimi i kërkuar në kuadër të arrestimit të tij mund të jenë e vetmja masë e efektshme për sigurimin e atyre provave apo informacioneve.

29. Së fundi, në lidhje me proporcionalitetin e cenimit që do të shkaktohej mbi të drejtat e z. Krasniqi kundrejt qëllimit legjitim të hetimit, gjykatësi i procedurës paraprake mund të marrë parasysh, ndër të tjera, natyrën e rëndë të akuzave të konfirmuara,<sup>30</sup> kohëzgjatjen dhe shkallën e masave të kërkuara dhe garancitë mbrojtëse që do të zbatohen.<sup>31</sup> Qëllimi legjitim i hetimit është ndjekja penale e z. Krasniqi për krimet për të cilat akuzohet dhe mbledhja e provave dhe informacionit, përfshirë edhe respektimi i të drejtave të viktimave. Në lidhje me garancitë mbrojtëse që do të zbatohen, gjykatësi i procedurës paraprake mban parasysh faktin se, sikurse mishërohet në rregullat 31-33 dhe 39 të Rregullores, ZPS-ja ka për detyrë të marrë masat e nevojshme në lidhje me të drejtat për integritet personal, privatësi ose pronë. Po aq i rëndësishëm është edhe zotimi i ZPS-së se do ta përshtatë kryerjen e kontrollimit dhe sekuestrimit të autorizuar dhe/ose do t'u përcjellë informacionin dhe udhëzimet e nevojshme autoriteteve të tjera që mund të ndihmojnë në kryerjen e kontrollimit dhe sekuestrimit, për të garantuar kryerjen e tyre në një mënyrë që përjashton informacion që nuk parashikohet të jetë i rëndësishëm dhe e cila është në përputhje me garancitë mbrojtëse të përcaktuara në rregullën 39 të Rregullores.<sup>32</sup> Rrjedhimisht, në qoftë se kryhen në përputhje me kushtet e përcaktuara në Rregullore

---

<sup>29</sup> Kërkesa, para. 7; Shtojca 2 e Kërkesës, f. 10-22 (Reagimi i Jakup Krasniqit në Facebook).

<sup>30</sup> Akuzat janë në lidhje me krimet kundër njerëzimit të përndjekjes, burgimit, veprimeve të tjera çnjerëzore, torturës, vrasjes së paligjshme, dhe zhdukjes me forcë të personave, dhe me krimet e luftës të ndalimit arbitrar, trajtimit mizor, torturës dhe vrasjes së paligjshme, përkatësisht në shkelje të nenit 13(1) dhe nenit 14(1)(c) të Ligjit.

<sup>31</sup> Aktvendimi i Dhomës së Gjykatës Kushtetuese të Dhomave të Specializuara të Kosovës i datës 28 qershor 2017, para. 64.

<sup>32</sup> Kërkesa, para. 44.

dhe në këtë vendim, gjykatësi i procedurës paraprake konstaton se kontrollimi dhe sekuestrimi i kërkuar janë proporcionalë me qëllimin legjitim të hetimit.

30. Pasi ka konstatuar se janë përmbushur kushtet e lartpërmendura, gjykatësi i procedurës paraprake autorizon kontrollimin dhe sekuestrimin e kërkuar meqenëse janë në përputhje me kriteret e përcaktuara në rregullën 31 dhe rregullën 37 të Rregullores.

#### B. ORARI, KOHËZGJATJA DHE SHKALLA E KONTROLLIMIT DHE SEKUESTRIMIT

31. ZPS-ja nuk bën të ditur kohën e kryerjes së kontrollimit të z. Krasniqi, të shtëpisë/shtëpive të banimit, zyrës/zyrave, automjetit/automjeteve dhe/ose të vendit të arrestimit të tij, dhe të sekuestrimit përkatës të sendeve. Sidoqoftë, është e qartë nga Kërkesa se kontrollimi dhe sekuestrimi i autorizuar do të ndodhin në kuadër të arrestimit të z. Krasniqi. Duke baraspeshuar rëndësinë e faktorit kohë për veprimet hetimore dhe kohën që i nevojitet ZPS-së apo cilitdo autoriteti tjetër përkatës për organizimin e kontrollimit dhe sekuestrimit të autorizuar nga njëra anë, dhe, nga ana tjetër, pritshmërinë e arsyeshme të z. Krasniqi për privatësi si edhe nevojën për mbikëqyrje gjyqësore të zbatimit të këtyre masave, gjykatësi i procedurës paraprake gjykon se për kryerjen e kontrollimit dhe sekuestrimit të autorizuar të z. Krasniqi mjaftojnë 14 ditë nga dita e arrestimit të z. Krasniqi.

32. Kontrollimi dhe sekuestrimi i autorizuar duhet të kufizohen në prova ose informacion që besohet se janë përdorur në, janë në lidhje me, ose janë të rëndësishme për akuzat e konfirmuara, si dhe për respektimin e të drejtave të viktimave. Kjo ka të bëjë në veçanti me prova që lidhen me veprimtarinë e z. Krasniqi midis viteve 1998 dhe 1999, marrëdhëniet ose ndërveprimet e tij me UÇK-në dhe/ose QPK-në ose me anëtarë të tyre, apo me viktima, dëshmitarë ose bashkëkryes të pretenduar, dhe me çfarëdo prove tjetër që ka lidhje me respektimin e të drejtave të viktimave. Ndër sendet që do të sekuestrohen mund të përfshihen: shënime nga kontakte apo

mbledhje, të dhëna financiare ose pronësore, ditarë, regjistra, vendime, fotografi, videoincizime dhe audioincizime, urdhra, udhëzime, direktiva, raporte, politika, protokolle apo rregullore, si dhe kompjuterë, telefona dhe pajisje të tjera që logjikisht mund të pritet se përmbajnë prova relevante.

#### C. RAPORTIMI PËR KONTROLLIMIN DHE SEKUESTRIMIN

33. Në përputhje me rregullat 31(2) dhe 37(4)(b) të Rregullores, ZPS-ja duhet të raportojë për zbatimin e masave të kërkuara. Duke marrë parasysh kohën e nevojshme për përgatitjen e një raporti pas zbatimit të masës së kërkuar, ZPS-ja duhet të paraqesë një raport brenda 14 ditësh nga përfundimi i kontrollimit dhe sekuestrimit të autorizuar, ose brenda 14 ditësh nga përfundimi i afatit 14-ditësh të përcaktuar për kryerjen e kontrollimit dhe sekuestrimit të autorizuar, në cilëndo datë të mëhershme. Raporti duhet të përmbajë: (a) datën, orën, kohëzgjatjen, vendndodhjen, shkallën dhe rrethanat e kontrollimit dhe sekuestrimit; dhe (b) përmbushjen e kritereve të parapara në rregullën 39 të Rregullores. Nëse kontrollimi dhe sekuestrimi i autorizuar, ose pjesë të tyre, do të kryhen në mungesë të z. Krasniqi, raporti duhet të përmbajë gjithashtu rrethanat e jashtëzakonshme që përlligjin kryerjen e tyre, si dhe përmbushjen e garancive të tjera mbrojtëse, sikurse përcaktohen në paragrafin **Error! Reference source not found.** më poshtë.

#### D. MBAJTJA, RUAJTJA DHE MBROJTJA E MATERIALIT TË SEKUESTRUAR

34. Gjykatësi i procedurës paraprake gjykon se është e nevojshme që ZPS-ja të ruajë, mbrojë dhe transferojë materialin e sekuestruar në përputhje me procedurën standarde të kronologjisë së mbajtjes në ruajtje. Gjatë kësaj, ZPS-ja duhet të ndërmarrë masat e duhura për mbrojtjen e materialit të sekuestruar nga humbja, qasja e paqëllimshme ose e paautorizuar, ndryshimi, shpërndarja apo asgjësimi. Në raportin

e vet, ZPS-ja informon gjykatësin e procedurës paraprake për procedurën dhe masat e përshtatshme për ruajtjen dhe mbrojtjen e materialit të sekuestruar.

35. Gjykatësi i procedurës paraprake gjykon se për vlerësimin e rëndësisë së materialit të sekuestruar mjafton një afat prej katër muajsh nga data e kryerjes së kontrollimit dhe sekuestrimit të autorizuar. Në qoftë se konstatohet se materiali i sekuestruar është i rëndësishëm për hetimin apo për çfarëdo faze të procedurave në të ardhmen në lidhje me akuzat e konfirmuara ose me veprat penale të pretenduara në bazë të nenit 15(2) të Ligjit, ZPS-ja, në pajtim me rregullën 33(1)(b) të Rregullores mund ta mbajë materialin deri kur ai pushon së qeni i rëndësishëm për qëllimin për të cilin është marrë. Në atë rast, materiali i sekuestruar duhet të kthehet ose asgjësohet në përputhje me rregullën 33(2)-(3) të Rregullores. Në qoftë se materiali i sekuestruar nuk lidhet me qëllimin e hetimit për të cilin është marrë dhe nuk është i rëndësishëm për hetimin e një vepre penale tjetër brenda juridiksionit të Dhomave të Specializuara, materiali i sekuestruar duhet të kthehet ose asgjësohet menjëherë, në përputhje me rregullën 33(1)(a)(i) dhe (2)-(3) të Rregullores.

#### E. ZBATIMI DHE DORËZIMI I URDHËRIT TË KËRKUAR

36. Në qoftë se kontrollimi dhe sekuestrimi i autorizuar, ose pjesë të tyre, do të kryhet në Kosovë, gjykatësi i procedurës paraprake rikujton se, sipas nenit 35(3) të Ligjit, policia në kuadër të ZPS-së ka autoritetin dhe përgjegjësinë për të ushtruar kompetencat që ka Policia e Kosovës në bazë të legjislacionit të Kosovës. Për këtë arsye, edhe ZPS-ja mund të konsiderohet "autoritet kompetent" brenda kuptimit të rregullës 49(1) të Rregullores, e aftë për zbatimin dhe dorëzimin e urdhrave të Dhomave të Specializuara, ndër të cilët edhe urdhrin për kontrollimin dhe sekuestrimin e autorizuar. Rrjedhimisht, gjykatësi i procedurës paraprake autorizon ZPS-në që të dorëzojë dhe zbatojë këtë vendim.<sup>33</sup> Nëse është e nevojshme, ZPS-ja

---

<sup>33</sup> Me njoftimin e këtij vendimi Prokurorit të Specializuar, transmetimi quhet i kryer në përputhje me rregullën 49(1) të Rregullores.

mund ta dorëzojë dhe zbatojë vendimin në bashkëpunim me autoritetet kompetente në Kosovë.

37. Në qoftë se kontrollimi dhe sekuestrimi i autorizuar, ose pjesë të tyre, do të kryhen në një shtet të tretë, gjykatësi i procedurës paraprake, në përputhje me nenin 55 të Ligjit dhe rregullën 208(1) të Rregullores, kërkon nga autoritetet kompetente që këtë vendim ta dorëzojnë dhe zbatojnë në praninë e përfaqësuesve të ZPS-së.

38. ZPS-ja parashton se kontrollimi dhe sekuestrimi i autorizuar mund të kryhen në mungesë të z. Krasniqi dhe se ajo synon të ndalojë përkohësisht përdorimin e komunikimeve jo të domosdoshme në vendin e kryerjes së cilitdo kontrollimi dhe sekuestrimi.<sup>34</sup> Duke qenë se këto kushte ndikojnë në të drejtat e z. Krasniqi gjatë kontrollimit dhe sekuestrimit të autorizuar, gjykatësi i procedurës paraprake e konsideron të nevojshme të vlerësojë dhe, sipas nevojës, t'i përfshijë këto kushte në këtë vendim.

39. Sikurse u theksua më lart, kontrollimi dhe sekuestrimi i autorizuar do të kryhen në kuadër të arrestimit të z. Krasniqi dhe brenda 14 ditësh. Në lidhje me këtë, gjykatësi i procedurës paraprake thekson se në bazë të nenit 41(5) të Ligjit dhe rregullës 50(1) të Rregullores, çdo person të cilit i është hequr liria nga Dhomat e Specializuara ose në emër të tyre, transferohet dhe paraqitet pa vonesë para gjykatësit të Dhomave të Specializuara. Gjykatësi i procedurës paraprake gjithashtu thekson statusin e z. Krasniqi si person i njohur për shkak të pozitave të tij në të kaluarën<sup>35</sup> si edhe mundësinë e shqetësimeve më të mëdha për sigurinë që mund të sjellë arrestimi i tij brenda Kosovës apo në një shtet tjetër. Në lidhje me sa më lart, kontrollimi dhe sekuestrimi i autorizuar, ose pjesë të tyre, mund të kryhen në raste të jashtëzakonshme në mungesë të z. Krasniqi, në qoftë se ZPS-ja mund të demonstrojë se kjo është absolutisht e domosdoshme për garantimin e sigurisë së vetë z. Krasniqi, të së drejtës së tij për t'u paraqitur pa vonesë para gjykatësit të procedurës paraprake, dhe/ose për

---

<sup>34</sup> Kërkesa, poshtëshënimi 130.

<sup>35</sup> Aktakuza e Rishikuar, para. 11-12.

ruajtjen e provave dhe të integritetit të hetimit. Në rrethana të tilla, z. Krasniqi ka të drejtën të caktojë një përfaqësues që të jetë i pranishëm gjatë kontrollimit dhe sekuestrimit të autorizuar, ose pjesëve të tyre, së bashku me një vëzhgues të pavarur dhe mbrojtësin e z. Krasniqi, përveç nëse zbatohet përjashtimi i paraparë në rregullën 39(1)(c) të Rregullores.

40. Për më tepër, pavarësisht nëse z. Krasniqi do të jetë i pranishëm në kontrollimin dhe sekuestrimin e autorizuar, gjykatësi i procedurës paraprake gjykon se për të siguruar integritetin e hetimit dhe të procedurave në lidhje me të, ZPS-ja ose autoritetet që e ndihmojnë atë në zbatimin e kësaj mase, mund t'ia ndalojnë atij përkohësisht përdorimin e mjeteve jo të domosdoshme të komunikimit elektronik gjatë gjithë kohës së kryerjes së kontrollimit dhe sekuestrimit të autorizuar, ose të pjesëve të tyre.

## V. VENDIM

41. Për arsyet e lartpërmendura, në lidhje me z. **Jakup Krasniqi**, i lindur më 1 janar 1951, me shtetësi kosovare (numri personal: [REDAKTUAR]), me adresë të fundit banimi të ditur: [REDAKTUAR], Prishtinë, Kosovë, dhe [REDAKTUAR], komuna e Gllogocit, Kosovë [REDAKTUAR] dhe me adresë të fundit pune të ditur: NISMA, Rruga Mujo Ulqinaku, nr. 42, 11000 Prishtinë, Kosovë, gjykatësi i procedurës paraprake:

- a. **AUTORIZON** kontrollimin dhe sekuestrimin e autorizuar në lidhje me kontrollimin e z. Krasniqi, të vendit të arrestimit dhe të shtëpisë/shtëpive të banimit, zyrës/zyrave, dhe automjetit/automjeteve të tij, si dhe sekuestrimin e çfarëdo provash ose informacioni që besohet se janë përdorur në, kanë lidhje me ose mund të jenë të rëndësishme për hetimin ose për cilëndo fazë të procedurave në të ardhmen në lidhje me akuzat e konfirmuara ose me veprat penale të pretenduara në bazë të

nenit 15(2) të Ligjit, përfshirë respektimin e të drejtave të viktimave, sikurse përcaktohet më me hollësi në paragrafin **Error! Reference source not found.** të këtij vendimi;

- b. **AUTORIZON** që, pas demonstrimit të ekzistencës së rrethanave të jashtëzakonshme, kontrollimi dhe sekuestrimi i autorizuar, ose pjesë të tyre, të kryhen në mungesë të z. Krasniqi në varësi të garancive mbrojtëse shtesë, sikurse përcaktohet më me hollësi në paragrafin **Error! Reference source not found.** më lart;
- c. **AUTORIZON** ZPS-në ose autoritetet që e ndihmojnë atë në zbatimin e urdhrit, që t'ia ndalojnë përkohësisht z. Krasniqi përdorimin e mjeteve jo të domosdoshme të komunikimit elektronik, me përjashtim të komunikimit të tij konfidencial me mbrojtësin, gjatë gjithë kryerjes së kontrollimit dhe sekuestrimit të autorizuar, ose pjesëve të tyre; dhe
- d. **AUTORIZON** ZPS-në që këtë vendim t'ua bëjë të ditur, kur është e përshtatshme dhe e nevojshme, ndër të tjera edhe autoriteteve që kryejnë kontrollimin dhe autorizimin e autorizuar.

42. Në qoftë se kontrollimi dhe sekuestrimi i autorizuar, ose pjesë të tyre, do të kryhen në Kosovë, gjykatësi i procedurës paraprake **AUTORIZON** ZPS-në që të dorëzojë dhe zbatojë këtë urdhër në përputhje me paragrafët **Error! Reference source not found.-Error! Reference source not found.** dhe **Error! Reference source not found.** më lart dhe rregullën 39 të Rregullores.

43. Në qoftë se kontrollimi dhe sekuestrimi i autorizuar, ose pjesë të tyre, do të kryhen në një shtet të tretë, gjykatësi i procedurës paraprake:

- a. **URDHËRON** Administratoren që këtë vendim t'ua transmetojë autoriteteve kompetente për dorëzim dhe zbatim;
- b. **URDHËRON** ZPS-në të këshillohet me Administratoren lidhur me përgatitjet e nevojshme praktike për dorëzimin dhe zbatimin e këtij vendimi;



- c. **KËRKON** prej autoriteteve kompetente që të kryejnë kontrollimin dhe sekuestrimin e autorizuar në praninë e një përfaqësuesi të ZPS-së dhe duke iu përmbajtur kushteve të mëposhtme, në qoftë se këto kushte nuk cenojnë legjislacionin shtetëror në fuqi:
- i. kontrollimi dhe sekuestrimi i autorizuar të përfundojnë brenda 14 ditësh nga arrestimi i z. Krasniqi;
  - ii. t'i lejohet z. Krasniqi ose përfaqësuesit të zgjedhur prej tij, sipas rastit, mbrojtësit të tij (përveç nëse zbatohet rregulla 39(1)(c) e Rregullores) dhe një vëzhguesi të pavarur, që të jenë të pranishëm gjatë kryerjes së kontrollimit dhe sekuestrimit të autorizuar;
  - iii. zotit Krasniqi t'i ndalohet përkohësisht përdorimi i mjeteve jo të domosdoshme të komunikimit elektronik, me përjashtim të komunikimit të tij konfidencial me mbrojtësin, gjatë gjithë kohës së kryerjes së kontrollimit dhe sekuestrimit të autorizuar;
  - iv. t'i lejohet përfaqësuesit të pranishëm të ZPS-së që të shënojnë orën, kohëzgjatjen, shkallën dhe hollësi të tjera lidhur me zbatimin e këtij vendimi, si dhe të përgatisë listën e inventarit me përshkrim të hollësishëm dhe informacion për çdo send të sekuestruar; dhe
  - v. materiali i sekuestruar, i cili mund të përfshijë shënime nga kontakte apo mbledhje, të dhëna financiare ose pronësore, ditarë, regjistra, vendime, fotografi, videoincizime dhe audioincizime, urdhra, udhëzime, direktiva, raporte, politika, protokolle apo rregullore, si dhe kompjuterë, telefona dhe pajisje të tjera që logjikisht mund të pritet se përmbajnë prova ose informacion relevant, t'i transferohet ZPS-së dhe të mbahet, ruhet e mbrohet prej ZPS-së;

- d. **KËRKON** prej autoriteteve kompetente që të informojnë përfaqësuesin e ZPS-së të pranishëm gjatë kryerjes së kontrollimit dhe sekuestrimit të autorizuar për çdo vështirësi ose pengesë teknike apo logjistike në zbatimin e këtij vendimi; dhe
- e. **KËRKON** prej autoriteteve kompetente që t'i trajtojnë kontrollimin dhe sekuestrimin e autorizuar si konfidencialë, dhe ekzistencën dhe përmbajtjen e këtij vendimi t'ua bëjnë të ditur vetëm atyre subjekteve dhe personave përfshirja e të cilëve është absolutisht e domosdoshme për kryerjen e kontrollimit dhe sekuestrimit të autorizuar.

44. Pavarësisht se ku do të kryhen kontrollimi dhe sekuestrimi i autorizuar, ose pjesë të tyre, gjykatësi i procedurës paraprake:

- a. **URDHËRON** ZPS-në të raportojë mbi kryerjen e kontrollimit dhe sekuestrimit të autorizuar brenda 14 ditësh nga përfundimi i tyre, ose brenda 14 ditësh nga përfundimi i afatit 14-ditësh të përcaktuar për kryerjen e kontrollimit dhe sekuestrimit, në cilëndo datë të mëhershme, në përputhje me paragrafin **Error! Reference source not found.** të këtij vendimi;
- b. **URDHËRON** ZPS-në të mbajë, ruajë dhe mbrojë materialin e sekuestruar dhe të raportojë mbi procedurën dhe masat paraprake për ruajtjen dhe mbrojtjen e materialit, në përputhje me paragrafin **Error! Reference source not found.** të këtij vendimi; dhe
- c. **URDHËRON** ZPS-në të vlerësojë rëndësinë e materialit të sekuestruar brenda katër muajsh nga data e kryerjes së kontrollimit dhe sekuestrimit të autorizuar si dhe të mbajë në ruajtje, kthejë ose asgjësojë materialin e sekuestruar sikurse përcaktohet në rregullën 33 të rregullores, në përputhje me paragrafin **Error! Reference source not found.** të këtij vendimi.

/nënshkrim/

---

**Gjykatës Nikola Giju**

**Gjykatës i procedurës paraprake**

E hënë, 26 tetor 2020

Në Hagë, Holandë.

Shënim shpjegues

Në paragrafin 2, rreshti 2, "Jakub" është korrigjuar në "Jakup".

Në poshtëshënimet 11 dhe 29, "Jakub" është korrigjuar në "Jakup".